

Vejdo(Ĉinio)



Ovacion al vi, mia patrujo

omaĝe al 70-a nacia festo de Nova Ĉinio

Jam antaŭ sepdek jaroj
diabloj el l' uesto kaj oesto
disŝiris la teritorion de vi
en pecojn senkomplete.
Per bajonetoj kaj pafiloj
buĉadis ili viajn popolanojn
jen kiel brutojn sen ribelo,
sen ajna plend' kaj lamento.

Diabloj damnindaj ja minace
bruligis, rabis, stupris,
masakris kaj tiranis.
Gefiloj viaj jen suferis
mizerojn, subpremadon,
vipbatojn kaj piedtretadon
kun retenita la indigno
kun senhelpa rezignacio.

Milito furiozis tra la lando,
soldatoj alilandaj, militlordoj
jen ŝajnis mastroj de la tero
saturita je la popola sango.
Bruadis bomboj, siblis kugloj,
zumego flugmaŝina ondis
super la kapoj de la ĉinoj,
infera timo regis trae.

Sed kompartio levis la batalon
kontraŭ agreso alilanda
kaj koruptema la Ĉjangkajŝek-registaro.
Finfine la popolo venkis,

reprenis okupitan la teritorion
de l' potencoj okcidentaj,
renversis la reakcian registaron
starigis la reĝimon ruĝan.

Laŭlonge kaj laŭlarĝe
vigleco, vervo vere ondis
por revivigi l' novan landon.
Sed embargo enŝoviĝis al vi
de tiuj tiranemaj trupoj tiam,
tiel ke malfacilo trafis vin.
Vi timas nenion kaj vin trenis
tra tian tristan turnopunkton.



Nun kia mit' okazas!
Ĉio komencis de nenio:
spacŝipoj, satelitoj, grandaj avioj,
rapidfervojoj, reto de ŝoseoj,
potencaj armeformoj, super-komputiloj,
esplorsondiloj profundmara,
supergiganta teleskopo...
Jen la miraklo trans mil jaroj!

Gefiloj viaj nun radias de ĝojridoj,
timante ne plu mankon de vivnecesaĵoj
nek fremdajn militsieĝadon kaj embargon.
En harmonio ili vivas ja feliĉe,
sen zorg' pri ĉiutagaj vivrimedoj.
Etoso paca kaj trankvila ĉiam regas
inter homrondoj, junaj kaj maljunaj,
konstante ŝajne kiel geamikoj.

Ni donu ovacion al vi, la patrujo,
ni kantu laŭdon al vi.
Ni kaj vi jam fandiĝas kiel maro,
ni estas ondoj kaj vi vasta oceano.
Ĉe via jubile' profundan dankon ni dediĉu
al viaj gloroj kaj meritoj indaj,
al via fleg-nutrado de ni ĉiuj ĉinoj,
al via defendad' de nia sekureco!

Eto (Ĉinio)

Sangruĝaj memoroj

okaze de Nacia Festo de 2019

Pase' de fruaj jaroj jen kirliĝas en la koro,
okaze de Nacia Festo en solena horo.
Por liberigo de l' naci' ni iam brave luktis
per sango, karno, forto kaj juneco de valoro.

Ni pene grimpis la neĝmonton de milfuta alto,
marĉejon vastan vadis je vivriska ludhazardo.
la malamikoj nin sieĝis per blokado fera
sed ni sukcesis ĝin trarompi saĝe per elsalto.

Ni iris norden bati la japanajn invadantojn
jen kvaz' liliputanoj kontraŭstaras la
gigantojn.
Ni tamen venkis super ili per popola forto,
sangverŝo brava fine gajnis la triumfajn
kantojn.

Por fondi la Ĉinion Novan ni balais plene
ok-milionajn trupojn malamikajn ja senpene.
Kvankam ni pagis pezan koston de sangkarn'
necesa,
ni liberigis tutan la popolon elkatene.

Ĝis nun jam sepdek jaroj ekde respublika
fondo,
nia patruj' ŝanĝiĝis multe pli ol l' inta mondo.
Sur vojo makulita per la sang' de pioniroj
la ĉinoj energie marŝu por la bela onto.

Maria Nazaré Laroca (Brazilo)



L' ekzistado, kiel mar'
reagas aŭ nin provokas;
kiel ĉe viv' ajna far':
vivo nur ĝin reciprokas.

Juiz de Fora, 10/09/2019

Paulo Nascentes (Brazilo)



poezio kvazaŭas
kvazaŭ ĝi navigus
l' akvon malprecizan
de kvazaŭ esprimita
io forfuĝinta

kavazaŭ svingiĝu
meze al vualita al kaŝita
al duon rivelita
ĝuo anoncita
orgasmo antaŭĝuita

poezio kvazaŭas
estas kvazaŭ Si
anoncante sin
— per si,
kvazaŭas poezi'!

Sero (Ĉinio)

Ah, homo!

Homo, kiel falfoli'
vagas en ventpelo.
Ju pli furioze kun mani'
vento blovas en kruelo,
des pli stulta jen fariĝas li
lia penso dronas en pelmelo.
Kie falas ĝi en agoni',
tie estas ĝia loĝoĉelo.

Mori (Usono)



AFORIME (43)

Valoro

de ĉiu vorto

kuŝas en ĝia forto.

Tion, kion vidas blinduloj

mi ne vidas

per miaj okuloj.

Oni per glavo

vundas malamikon

sed per lango

vundas amikon.

Afablaj gastoj

samkiel printempaj pluveroj

estas plezuraj aferoj.

Homo

kun griza hararo

estas sufiĉe aĝa

sed ne nepre

sufiĉe saĝa.

Homo

kun ridema mieno

ĉie renkontiĝas kun

"Bonveno."

Saĝuloj lernas de

spertaj aĝuloj

kaj ankaŭ de malsaĝuloj,

Malsaĝuloj lernas

nek de saĝuloj nek de

spertaj aĝuloj.

Bona homo zorgas

Pri si mem ,

sia hejmo

kaj ankaŭ

fremda homo.

Tiu, kiu rigardas

per pasiaj okuloj

estas blinda

pri makuloj.

Amiko ĵaluza

kaj tiu sen prudento

Pli malpli frue pikas

samkiel serpento.

Grandeco

de ĉiu homo

mezureblas per lia

paroltemo.

Homo

kun bonaj amikoj

estas kiel arbo

kun fortaj radikoj.

Ĉirkaŭ sukero

svarmas formikoj,

ĉirkaŭ malavaruloj

svarmas amikoj.

La plej granda

fripono

estas tiu, kiu surhavas

la maskon de

religia persono.

Tiuj, kiuj zorgas

pri Dio kaj Diablo,

Paradizo kaj Infero

estas la ĉefaj kreintoj

de mizero sur la tero.

Ĉirkaŭ riĉuloj

svarmas aĉuloj.

Ĉirkaŭ naivaj personoj

svarmas friponoj.

En la tempoj de

prospero kaj mizero

rekonebla homa karaktero.

Jen la plej bona leĝo;

ĉiu homo sur sia seĝo

estas respektinda

samkiel reĝo.

Por trovi homojn

kun grandaj saĝoj

serĉu ilin en

foraj vilaĝoj.

Ĉiu homo

ekde naskiĝ'

ĝis la morto

havas la rajton vivi

kun homa digno

kaj komforto.

Pro malnoblaj pasioj

kaj malfortaj racioj

okazas bataloj

Inter nacioj.

Ni kreu paradizon

por ĉiuj

Sur la tero,

Diablon lasu vivi

en sia infero.

Fidu je

vulpo ruza

sed ne je amiko

ĵaluza.

Mi konas

homfigurano skorpion

kiu estas terura despoto,

ĉirkaŭ kiu svarmas

sennombraj lakeoj

kaj idiotoj.

Azeno
surla alta posteno
servas pli bone ol
stulta persono.

Emocio
estas kaĝo
de la saĝo.

Libero
por la homarano
estas tiel necesa
kiel pano.

Krimojn de homo
en eleganta vesto
ankoraŭ faris
neniu besto.

Tie, kie virinoj
kaj infanoj
vivas feliĉe
estas la paradizo
de homaranoj.

Homoj, kiuj interbatalas
pro bagatela afero
finfine kuŝas pacoplene
sub la tero.

Nur grandanima,
larĝmensa persono
devas servi
sur la alta posteno.

Mil fojojn morti
kiel leono
plibonas ol vivi
longan vivon
kiel hieno.

Neplu leono
sed kapitalo
estas la reĝo
de la ĝangalo.

Tie, kie ĉiuj zorgas
pri komuna prospero
estas la paradizo
sur la tero.

Malgraŭ nova epoko
kaj nova normo
sklavismo ekzistas
en nova formo.

Tie, kie regas
la leĝoj de la ĝangalo
homoj konkuras
samkiel animalo.

Por ne vivi
en kaĝo
devas obeii la saĝon
kun granda kuraĝo.

Nenio kiel milito
kaj batalo
transformas homon
al animalo.

Ne estas diferenco
inter tiu, kiu pikas
serpente
kaj tiu, kiu tion observas
indiferente.

Sub la regado despotoj
suferas kaj patriotoj
kaj subtenantaj idiotoj.

La plej respektindaj homoj
sur la tero
estas tiuj, kiuj baraktas
por ĉies libero
kaj prospero.

Sub la premo de bezono
kaj minaco de l' glavo
homo vivas
kiel sklavo.

La plej nobla afero
estas batali
kontraŭ mizero.

kultura kaj ekonomia
mizero
estas la ĉefa kialo
de konfliktoj
sur la tero.

Kiam ĉiuj zorgas
pri KOMUNA prospero
tiam eblas krei
paradizon sur la tero.

Siv Burrel (Svedio)



Matenmanĝo kun novaĵoj

— Kia brila tago kun novaj eblecoj,
pensis mi matene kafumante,

prenis el pano pli da pecoj
aŭskultis radion iomete pigrante.

Eksaltis mi kiam el Kabul'
oni raportis pri korespondent'
mortpafita de iu krimul'
el la talibana gent'.

Alkutimigitaj estis ni
al raportoj de Nils Horner, svedan'
raportintaj pri demokrati'
aŭ la kontraŭo en Afganistan'.



ilustraĵo de la aŭtorino

Lian voĉon ni ne plu aŭdas
sed lian laboron ni vere laŭdas!
Li mankas al ni.



ilustraĵo de la aŭtorino

Nebuleta tago ĉe river'

Nebuletan tagon je printemp'
pri akva transformiĝo pensis mi,
kiam nuda mana tremp',
donis malvarmon al mi:
El glacio al degel',
el pluvo al neĝ',
el akvo en kaserol'
al vaporplena aer'.

Jen bruna kaj densa la kolor'
pro folioj velkaj kaj pro ŝlim',
jen sur ĝi naĝas kun fervor'
anasoj en vicoj foje sen lim'.
Jen torenta kun ŝaŭmo blanka,
foje fluanta en trankvila takt'.
Jen sur ĝi ni iras ĝoje,
invitite al pagajado foje.

Akvo kara, fortegaj viaj molekuloj!
Boaton sur surfaco tenu!
Donu freŝon al la uloj!
Dio vin eterne benu!

Sveta Konjashova (Rusio)



Herboj

Ĉapel' impresas,
La koro freŝas,
Kaj tago junas,
La horo sunas,
Tra herboj—vojo,
Anime—ĝojo.

Kato kaj hundo

Tenas la hundon firmĉeno,
Estas neebila promeno.
Kato forkuras de spleno
Ĉiam de korto sen ĝeno.

Cecília Meireles

MOTIVO

Mi kantas ĉar la moment' ekzistas
kaj mia vivo dece kondutas.
Ne ĝoja estas mi nek mi tristas,
versojn disŝutas.
Ĉar mi fratas al kio ne daŭras,
min egalas kaj ĝu' kaj turmento.
Ĉu tage ĉu nokte senbedaŭras
mi tra la vento.

Ĉu mi renversu, ĉu mi konstruu,
ĉu mi restu, ĉu mi malaperu,
ve mi ne scias ĉu mi kongruu,
ĉu mi diseru.

Mi kantas, kaj kanti estas ĉio.
 Varmas eterne la ritmofrapo.
 Mi nepre iam mutos, nur tio,
 sen ia gapo.

Tradukis



Wel CR (Brazilo)

Fernando Pessoa



Ne. Mi volas nenion

Mi jam diris: mi celas nenion.
 Restu for kun viaj konkludoj!

La ununura konkludo nomiĝas morti.
 Ne molestu min per iuj ajn artodoktrinoj!

Ne parolu al mi pri moralo!
 For el miaj okuloj kun la metafiziko!
 Ne detaligu al mi ĉiujn meritojn de la scienco!
 (de la scienco, Dio mia, de la scienco!)

Cetere mi estas freneza kaj tio mi estas
 plenrajte.

Kun plena rajto, ĉu vi komprenas?
 Ĉe la ĉielo, lasu min en paco!

Ĉu vi volas havi min ĉiutaga, nulula,
 geedziĝinta, imoŝtdevigita?

Ĉu vi volas min kiel la malon, kiel la malon de
 io?

Se mi estus alia, mi estus je via servo.
 Sed mi estas tiu, kiu mi estas, bonvolu delasi
 de mi!

Iru sen mi al la diablo.

Aŭ lasu min sola iri al la diablo!

Pro kio ni devigite iru kune?

Ne kaptu min brake!

Mi ne ŝatas, se iu kaptas min ĉe la brako.

Mi volas esti sola.

Mi jam diris, mi volas esti sola.

Kiel moleste, ke mi estu societema!

Marteno Opic (1597 – 1639)

Tomba enskribo de kuiristo

La mond' sin turnas kaj surkape staras.
 Jen kuirist' en tombo en kviet'.
 Li kreis multajn manĝojn kaj kun pret'.
 Nun vermoj krudan manĝon el li faras.

Esperantigis



**Hans-Georg Kaiser
 (Germanio)**

El Ĉina Antikva Poezio

He Zhizhang (ĉ. 659 – ĉ. 744)

Improvizado pri rehejmiĝo (1)

Foriro en juneco, reven' en alta aĝo;
 Ŝanĝiĝis ĉio krom la akĉento de l' vilaĝo.
 Infanoj min ne konas kaj ride pridemandas:
 “De kie vi alvenas, aveto en vojaĝo?”

Improvizado pri rehejmiĝo (2)

De post forlas' de hejmo jam pasis multaj
 jaroj,
 Dum kiuj konsumiĝis plejparte homaj faroj.
 Nur l' antaŭporda lago ebena ne ŝanĝiĝis, —
 Ankoraŭ ĝin karesas printempaj ond-muaroj.

Kanto pri l'saliko

Sin trovas la saliko en smeralda tualetto,
Kaj pendas la branĉetoj supraj en centmilo.
Sed kiu tajlis ĉi foliojn sveltaj kaj graciaj? —
Jen vento de printempo frua kiel pritondilo.

Hu Lingneng (785 - 826)

Infano fiŝhokanta

Infano kun taŭzitaĵoj lernas fiŝhokadon,
Sidante viglatente sur herboza musk-tapiŝo.
Pasanto venas pridemandi vojon, li mansignas
Tuj la ĉuanton por ne fortimigi ĝin – la fiŝo!

Liu Yuxi (772—842):

Rigarde al la lago Dongting

L' aŭtuna luno harmonias kun la lago, kies
Surfac' similas spekulon opakan en kvieto.
La monto verda ĉe la akvo ŝajnas, se vidate
De fore, konko spiralforma sur arĝenta pleto.
Elĉinigis



Minosun (Ĉinio)

Ouyang Xiu (1007-1072)

Halo Pingshan

—laŭ melodio *Pedanta klerulo*
Ekster la Halo serenas ĉielo,
montoj en foro sin montras
vere en svaga rivelito.

Antaŭ la Hal' elkreskinta saliko,
kiun mi plantis, jam nun en fortiko
staras, ho, kiom da ventoj printempaj,
ekde kiam mi foriris ĉi tien,
ĝi jam travivis sen flega tekniko?

Kiel la gubernatoro,
estas mi ja verkemulo,
kiu ekskribas kun granda fervoro
kaj jam ne ĉesas plu ĝis dek mil vortoj.
Ankaŭ mi ŝatas drinkadi kun voro
tason post taso ĝis milo en folo.

Vivon ni ĝuu frue dum junaĝo!
Kvankam mi estas oldulo kaduka,
en vintrinkado mi ankaŭ orgie
kiel junul' kun kuraĝo!

Antaŭ la gastejo

—laŭ melodio *Paŝo sur herbo*
Antaŭ la gastejo velkas
jam prunfloroj plene;
ĉe la ponto super roĝo
salikŝosoj longe mincas ĉene.
Herboj spiras bonodore,
blovas varma vent' senĝene,
kaj rajdantoj per vipbatoj
la ĉevalojn spronas bridoprene.
Ili ju pli iras jen antaŭen,
ili des pli ja mienas ĉagrene.
Afliktiĝ' ilia, kiel la rivero
en printempo, fluas susurĝeme.

Adiaŭantinoj ekhavas kordoloron
kaj larmeroj perlas de l' pudrita vango.
Ne ascendu altan turon por rigardi
vin apoge kontraŭ l' parapeto.
Ĉar trans la ebenaĵo vasta
staras montoj ĉe alia flanko,
kaj l' rajdatoj jam sin trovas
en la malproksima blanko.

Mi volus fiksi l' daton

—laŭ melodio *Printempo en jada pavilono*
Mi ja volus fiksi l' daton
hejmreveni klare,
kun pokal' enmane
sed vi montras senerare
trist-mienon plorsingulte,
antaŭ ol deklare

mi malfermos buŝon ja por diri.
 Homoj sentoplenaj 'tas egale,
 eĉ kelkfoje ĝis sent-fole.
 Malŝatemo al disiĝ' reale
 jen nature ne rilatas
 al la vent' kaj luno speciale.

Ne al mi arion novan kantu,
 kiu povus tordi col' post colo
 miajn koron kaj inteston
 pro sentimentala senkonsolo.
 Nune vi bezonas nur rigardi
 peoniojn tra la urb' sen solo,
 sed rondiri kune kun mi,
 tiel ke facilas kun memvolo
 diri adiaŭon al vent' printempa
 kiu tuj foriros en petolo.

Kun ĉarma fon' de l' Okcidenta Lago

—laŭ melodio *Moruskolektanta knabino*
 Kun ĉarma fon' de l' Okcidenta Lago
 per boateto oni remas ĝoje, senenue.

La verda akvo etendiĝas jen sinue,
 sur longa dig' kovriĝas per junherba
 drako.

Aŭdiĝas la obtuzaj muziksonoj ĉie,
 verŝajne ili sekvas nin alkroĉiĝeme.

La akvsurfaco glatas tre ebene,
 la boatetoj glitas ja stabile tie kaj ĉi tie.

Ondetoj ete lulas boatetojn kaj instige
 akvbirdojn pelas flugi super bordojn
 timpanike.

Aspektas plaĉe l' Okcidenta Lag' kun belo

—laŭ melodio *Moruskolektanta knabino*
 Aspektas plaĉe l' Okcidenta Lag' kun belo,
 eĉ post falado de diversaj floroj:
 troviĝas la ruĝ' velkinta en pelmelo,

folioj dance flirtas kun leĝero,
 falpendas salikvergoj en svingado,
 taglume karesante la lagakvon en glimhelo.

Turistoj forpaŝadas ar' post aro,
 muziko de blovflutoj ankaŭ svenas.
 Tiele mi eksentas kvaz' en kava valo
 malplenon kaj vakuon de printempo.
 Mi mallevante kun sentimentalo
 fenestr-kurtenon vidas hirundparon
 reveni en nebula pluv-vualo.



Zhuangzi

ĈAPITRO DEKNAŬA Plena kompreno pri la vivo

§19-10

La lignaĵisto Qing pritrancis pecon da ligno por fari el ĝi sonoril-framon. Kiam la sonoril-framo estis finita, ĉiuj, kiuj vidis ĝin, admiregis lian mirindan lertecon.

Ekvidinte ĝin, la reĝo de la regno Lu demandis Qing, dirante:

“Kia estas la mistero en via arto?”

“Mi estas simpla lignaĵisto,” respondis Qing.
 “Kiel mi povus havi misteron en mia arto! Kaj tamen mi havas ion menciindan. Antaŭ ol eklabori, mi ne kuraĝis malŝpari mian energion. Mi devis fasti por kvietigi mian menson sur ĝi. Post tritaga fastado, mi ne plu havis pensojn pri rekompenco aŭ profito; post kvintaga fastado, mi ne plu havis pensojn pri laŭdo aŭ mallaŭdo; post septaga fastado mi ne plu havis pensojn pri miaj membroj kaj korpo. Tiutempe, kun neniaj pensoj pri la reĝa kortego, mi koncentris min sur mian metian lertecon kaj forpelis de mi ĉiujn pensojn pri la ekstera mondo. Poste mi eniris en montan arbaron por observi la naturajn kvalitojn de la arboj. Kiam mi trovis arbon kun taŭga formo, mi vidis

en mia mensa okulo la sonoril-framon antaŭ ol komenci la laboron. Se ne, mi forlasis ĝin por trovi pli taŭgan. Tiamaniere mi konformigis mian naturan dispozicion al la natura dispozicio de la arbo. Jen probable kial la sonoril-framo aspektas tiel, kvazaŭ ĝi estus verko supernatura.”

§19-11

Dongye Ji estis lerta en la ĉarokondukado kaj per tio li havis okazon vidi la dukon Zhuang de la regno Lu. Li povis konduki la ĉaron antaŭen kaj malantaŭen tiel rekte, kvazaŭ laŭ streĉita ŝnuro, kaj turni la ĉaron dekstren kaj maldekstren tiel ronde, kvazaŭ laŭ cirklo desegnita per cirkelo. Pensante, ke eĉ Zaofu, la legenda plej bona ĉarokondukisto, ne povus esti tiel lerta, kiel li, la duko Zhuang ordonis, ke li faru cent rondirojn per la ĉaro kaj poste revenu al la palaco.

Yan He, kiu hazarde preterpasis tie, vidis tion kaj diris al la duko:

“Mi timas, ke la ĉevaloj de Dongye Ji kolapsos pro tio.”

La duko Zhuang ne donis respondon.

Baldaŭ la ĉevaloj de Dongye Ji plene elĉerpiĝis kaj estis rekonduktaj al la palaco. La duko Zhuang demandis Yan He, dirante:

“Kiel vi sciis, ke la ĉevaloj kolapsos?”

“Liaj ĉevaloj jam laciĝis, sed li ankoraŭ tenis ilin galopantaj. Jen kial mi diris, ke ili kolapsos.”

§19-12

La metiisto Chui povis tiri per la mano cirklojn tiel perfekte, kiel per cirkelo, ĉar liaj fingroj sekvis la formon de la objekto tiel lerte, ke li tute ne bezonis fiksi sian atenton sur ĝi.

Se vi forgesas la ekziston de viaj piedoj, tio ŝuldas al la laŭmezureco de la ŝuoj. Se vi forgesas la ekziston de via talio, tio ŝuldas al la laŭmezureco de via zono. Se vi forgesas la distingon inter la pravo kaj la malpravo, tio ŝuldas al la trankvileco de via koro. Se vi nek ŝanĝas vin en la menso, nek blinde sekvas aliajn, tio ŝuldas al via perfekta adaptiĝo al la ekstera mondo. Estu ĉiam en trankvileco interne kaj en adaptiĝo al la ekstera mondo — jen kio forgesigas al vi vian memon.

§19-13

Iu homo nomata Sun Xiu venis viziti Majstron

Bian Qing kaj demandis tiun tuj ĉe ties pordego, dirante kun granda konfuziteco:

“En mia vilaĝo ja neniu diras, ke mi estas senvirta; antaŭ danĝeroj, ja neniu diras, ke mi estas senkuraĝa. Kaj tamen mi neniam havis bonan rikolton; por servi al la reĝo mi neniam havis favoran okazon. Mi estas malakceptita de la najbaroj kaj estas elpuŝita de la regnificistoj. Kian malbonon mi faris kontraŭ la ĉielo? Kial mi devas renkonti tian sorton?”

“Ĉu vi ne aŭdis, kiel kondukas la perfekta homo?” respondis Bianzi. “La perfekta homo forgesas siajn hepaton kaj galvezikon kaj neglektas siajn okulojn kaj orelojn. En plena nesciado kaj senceleco li vagadas ekster la polvo kaj malpureco de la homa mondo; libera kaj senzorga, li promenas en la regno de senagado. Jen kion signifas la diro: ‘agadi sen atribui al si meritojn, gvidi aliajn sen ilin devigi’. Nun vi penas akriigi vian saĝecon por vekti la stultulojn, kulturas vin mem por reliefigi alies malbonecon, kaj paradas per viaj kapabloj, kvazaŭ vi marŝus tenante la sunon kaj la lunon en viaj manoj. Vi ja estas sufiĉe feliĉa, se vi povas konservi vian fizikan formon kaj viajn sensojn, ne esti reduktita al surdeco, blindeco, kripleco kaj antaŭtempa morto, kaj esti listigita inter la normalaj homoj. Kiel do vi havas la liberan tempon por plendi kontraŭ la Ĉielo? Prefere foriru de ĉi tie!”

Post kiam Sun Xiu foriris, Bianzi eniris en sian domon. Li sidis iom da tempo, levis la okulojn supren al la ĉielo kaj eligi profundan suspiron.

“Kial vi suspiras, Majstro?” demandis unu el la disĉiploj.

“Kiam ĵus Sun Xiu estis ĉi tie,” respondis Bianzi, “mi rakontis al li pri virto de la perfekta homo. Mi timas, ke li estos surprizita kaj konfuzita.”

“Mi pensas, ke certe ne,” diris la disĉiplo. “Se la vortoj de Sun Xiu estas ĝustaj kaj viaj vortoj estas malĝustaj, estas do evidente, ke tio, kio estas malĝusta, ne povas konfuzi tion, kio estas ĝusta. Se liaj vortoj estas malĝustaj kaj viaj vortoj estas ĝustaj, li fakte jam estis konfuzita, antaŭ ol li venis al vi. Se tiel estas, je kio do vi estas kulpa?”

“Ne trafa estas via diro,” diris Bianzi. “Iam unu birdo sidiĝis ie proksime de la ĉefurbo de la regno Lu. Ĉar la suvereno tre ŝatis ĝin, li preparis luksan

bankedon por regali ĝin kaj ludigis la muzikon *Jiushao* por amuzi ĝin. Plena de maltrankvileco kaj malgajo, la birdo konfuziĝis kaj ne kuraĝis manĝi, nek trinki. Tio estas nomata nutrado de la birdo en la maniero nutri la homon. Por nutri birdon en la birda maniero oni devus lasi ĝin sidi en la profunda arbaro, flugadi super riveroj kaj lagoj, manĝi angilojn kaj aliajn fiŝetojn sur liberaj kampoj. Sun Xiu estas homo senscia kaj malbone informita. Rakontante al li pri la virto de la perfekta homo mi agis kiel homo transportanta muson per ĉaro aŭ amuzanta birdon per muziko de sonoriloj kaj tamburoj. Kiel tiuj bestetoj ne povus esti timigitaj?”

Elĉinigis



Wang Chongfang

(Ĉinio)

Ĉineske

Miric Jadranka (Serbio)



Pasis jaro

—laŭ ĉinesko Sopir-al-sudo*

Serĉis mi
vin inter steloj,
je kruciĝo de sonĝoj
inter freŝaj memoroj.
En oldaj fotoj.

Sur blua
ĉielo naĝas
ŝip' en via senfino.
Via haveno pacas.
Ho, poreternas.

Neniel

mi povis kredi
ke neniam ni vidos
Nin. Senvoĉe babili,
nokte vin sonĝi.

Sen tuŝoj,
sen zorgoj, sen.... Ve
Pasis jam unu jaron!
La kurteno falis. Ve
Larmoj fluas. Ve.

Kial vi
mortis subite,
sen lasta adiaŭo?
Estu memor' laŭrite.
Al vivo spite!

Korkas boato

—laŭ ĉinesko Sopir-al-sudo*

Malfrua
somera tago.
Senventa varmega nokt'.
Ofta homa reago
pro fe' el lago.

Plurtaga
pikniko kun ci .
Mankas elfaj rakontoj
je magia loko. Vi
sorĉanta en ĝi.

Vitala
kavaliro, ve
dronis savante sian
princinon vidalvide.
Vokita karme.

Kvazaŭ Elf'
lagon malbenis.
Akvokirlo kaŝita
mire ilin allogis.
Nur salik' ploris.

Jen ĝiaj
pendantaj branĉoj
tuŝas lagon surfacon,
kiel vanaj atentoj.
Restis legendoj.

Kiom ordas amo

—laŭ ĉinesko Sopir-al-sudo*

Ekpepis
sur branĉo birdar'.
Milda ventoblovado.
Jen, sub Tilia branĉar'
brakumanta par'.

Kisado
daŭras pli ol hor'.
Krom ĉiela lunombro
ilin kaŝis stela or'
ĝis brila aŭror'.

Fajretoj
en okuloj al
vibranta stel' similas,
pro amofebro. Tial
fortas amreal'.

Viola
aŭrora maten'
Sur horizonto bluas.
Bruas sonoj en plen'
—natura ĝarden'.

Ve, mortis
en la vazo plantoj,
pro sufoka somero.
Soifis foje laŭ voj'
gajaj kisantoj.

Luiza Carol (Israelo)



SOPIRO EN SEPTEMBRO

—laŭ ĉinesko Sopir-al-sudo*

Vetero
jen malvarmiĝas.
Birdoj sopiras al sud',
multaj brue ariĝas
kaj deteriĝas.

**Sopir-al-sudo (ĉine: Yijiangnan): ĉina fiksfirma poemo el kvin versoj de 35,77,5 silaboj laŭ rimarango xa,xa,a (x=senrima).*

Mikronoveloj

Forgesemo

Miaj geavoj estas tre forgesemaj. Hieraŭ post vespermanĝo avinjo volis, ke avĉjo prilavu manĝilaron, kaj li kolereiĝis, dirante: “Kial vi volas, ke mi prilavu manĝilaron? Mi jam faris tion dum la tuta vivo. Mi ne faru tion.”

Avinjo ankaŭ kolereiĝis: “Vi oldulaĉo! vi devas fari tion post manĝado.”

Avĉjo des pli ekscitiĝis: “Mi povos fari tion, sed vi devas formanĝi la reston de la rizmanĝaĵo en la bovlo.”

Kun retenita kolero ŝi finmanĝis la reston de la rizmanĝaĵo en la bovlo. Tuj post tio li zorgeme demandis: “Ĉu vi jam finmanĝis? Do ni promenu ekstere.”

Ŝi diris: “Hej, oldulaĉo, ni ŝajne ĵus kverelis. Pro kio?”

